



禪源諸詮集都序





皇圖鞏固
帝道遐昌
佛日增輝
漢輪常轉

重刻禪源詮序

道不能自鳴假人而鳴鳴雖不同道則未嘗不同也苟不同不足以爲道如仲尼之一貫老聃之無爲釋氏之空寂人異道同此其證也況夫禪教兩宗同出於佛禪佛心也教佛口也豈有心口自相矛盾者乎奈何去聖時遙師承各異教者指禪爲暗證禪者目教爲漸修明暗未得其公頓漸罔知攸定迭爲詆毀殆若仇讎非但鼓之空言抑且筆之簡冊世道日下弊將何如昔圭峯禪師患之遂將教禪諸祖著述章句旨意相符者集爲一書名曰禪源諸詮以訓于世

將使兩家學者知一佛無二道四河無異味言歸于
好永無敗盟源詮之功豈易量哉予每見南方此弊
尤甚安得人有是書一洗舊習咸與惟新興念至此
未嘗不廢食而歎也今雪堂總統大師若有所契特
捐衣長復新諸梓以廣流傳千里走書俾爲序引裴
公相國旣述于前自視何人敢此凌躡以貽識者之
誚然而此書平生所愛慕者何幸挂名其間故不讓
也大德七年七月住崑山薦巖無外惟大序

重刻禪源詮序

禪源詮者唐圭峯禪師之所作也佛之道廣周法界
而細入微塵非有非空無內無外後之學禪者志窮
實相以言語爲苛纖設教者務覈真詮以空寂爲誕
肆離爲異門莫能統一豈佛之道本然哉於是以教
三種證禪三宗謂依性說相卽息妄修心破相顯性
卽泯絕無寄顯示真心卽直明心性江漢殊流而同
歸智海酸醎異調而共臻禪味至於空宗性宗之別
頓修漸修之殊莫不會其指歸開示正覺然又慮末
學之易惑而難悟也則又旁行爲畧朱墨以志之自

先
行
心

頓覺至成佛十重爲淨自不覺至受報十重爲染淨
染之源由於聖凡心法悉具真妄是名藏識不覺則
迷真逐妄歷劫輪迴頓覺則舍妄歸真隨順解脫雖
然學者要知真如闡教如標月指若復見月了知所
標畢竟非月則詮圖兩忘愚智通爲般若垢淨俱證
菩提南岳天台南僊北秀與達磨東來宗旨無有差
別尚何禪與教之分哉唐大中時裴相國休爲之叙
復手書是圖付金州延昌寺後傳唯勁師再傳玄契
師而圖行閩湘吳越間國朝至元十二年世祖御廣
寒殿願問禪教要義帝師及諸耆德以禪源詮對上

鐫
刊
子
鐫
刊
子

意悅命板行於世後二十有九年爲大德癸卯嗣法
雪堂仁禪師奉旨之五臺回途過大同得金時潛菴
覺公禪師所書畱益加攷訂鐫梓以傳諸遠俾圭峯
禪師研真顯正化導羣迷之意永久不墜其爲利益
何可稱量文原與師爲方外交乃隨喜讚歎爲之次
序其說書諸編首是歲閏月朔應奉翰林文字將仕
佐郎同知制誥兼國史院編修官巴西鄧文原書

重刻禪源詮序

雪堂禪師智識雄邁行解圓通喜修爲樂施與一日
謂余曰愚嘗患世之學佛者不究如來設教之因妄
執空有競分大小曰頓曰漸曰禪曰律訾訾紛紛千
數百年如護父足使具受病雖遇一二同志有以啓
之恨不能家喻而戶曉也幸得主峯所述禪源詮其
文博雅其旨切當悉叙前所患者道其所以然且作
圖示心一真實諦含三大義無明緣染諸相妄起依
修斷法獲證入理提綱舉要如指諸掌昔至元十二
年春正月世祖皇帝萬機之暇御瓊華島延請帝師

試人各
其好

恆乙
乙法

遼
遼

太保文貞劉公亦在焉乃召在京耆宿問諸禪教乖
互之義先師西菴贊公等八人因以圭峯禪源詮文
爲對允恆宸衷當時先師屬其弟雙泉泰公爲之記
仍命雪堂鏤板流行愚以叅問諸方未暇及此向於
雲中普恩興國二寺各獲一本後在京萬壽方丈復
得遼朝崇天皇帝太后清寧八年印造頒行天下定本
與文士較正擬欲刻梓以傳永久請叙一言庸伸先
師遺志余聞之喜曰今子之心卽圭峯師憂世之心
也然不有斯文無以解其惑不壽其傳無以利其衆
學者觀之而情不遣解不生亦何益矣古人所謂四

難者今三難不具其一則在諸方叅學者儻能不負
二師弘法利人之念盡心披玩情遣解生如王良總
六轡馳通衢阿師駕般若航登彼岸豈有不達者哉
翰林待制朝列大夫同修國史賈汝舟序

禪源諸詮集都序叙

唐綿州刺史裴休述

圭峯禪師集禪源諸詮爲禪藏而都序之河東裴休
曰未曾有也自如來現世隨機立教菩薩間生據病
指藥故一代時教開深淺之三門一眞淨心演性相
之別法馬龍二士皆弘調御之說而空性異宗能秀
二師俱傳達磨之心而頓漸殊稟荷澤直指知見江
西一切皆眞天台專依三觀牛頭無有一法其他空
有相破眞妄相收反奪順取密指顯說故天竺中夏
其宗實繁良以病有千源藥生多品投機隨器不得

一同雖俱爲證悟之門。盡是正真之道。而諸宗門下。通少局多。故數十年來。師法益壞。以承稟爲戶牖。各自開張。以經論爲干戈。互相攻擊。情隨函矢而遷變。孟子曰。矢人豈不仁於函人哉。函人唯恐傷人。矢人唯恐不傷人。蓋所習之術然也。今學者但隨宗徒。彼此相非耳。函字唐韻從金。鉶者鎧甲也。周禮函人爲甲。卽造甲之人。古字多單爲之。故孟子亦單作法。逐人我以高低是非紛拏。莫能辨析。則向者世尊菩薩諸方教宗。適足以起諍。後人增煩惱病。何利益之有哉。圭峯大師久而歎曰。吾丁此時。不可以默矣。尼仲

剛詩書正禮樂皆不得已而爲之。故述而不作。乃聖人貴道不貴跡。意道吾久修。當宗佛法。今忽和會諸宗。豈欲立跡哉。不得已也。丁於是。以如來三種教義。當也。正當須和會之時也。

印禪宗三種法門融瓶盤釵釧爲一金攪酥酪醍醐

爲一味振綱領而舉者皆順荀子云如振裘領屈五

數據會要而來者同趨趨字平聲呼之周易略例云

轉未足多也都序據圖教以印尚恐學者之難明也

又復直示宗源之本末真妄之和合空性之隱顯法

義之差殊頓漸之異同遮表之迴互權實之深淺通

局之是非此下歎敘述顯明莫不提耳而告之毛詩

面命之言提其耳當時疾彼人不修德荒亂言我不

對面向汝說又提耳起耳就耳邊告汝汝終不改也

意說丁指掌而示之論語云知其說者之於天下也

寧之甚其如視諸斯乎指其掌言夫子

語了指自手掌示弟子言見嘖呻以吼之愛軟以誘

此事分明如掌中之物易了

之此下歎慈悲憂乳而藥之憂佛種之天傷也

無少善根

而作闢提腹而擁之毛詩云腹我顧我言慈母念幼

是天傷也念水火之漂焚也欲是挈而導之懼邪小之

迷陷也既有善根又離五欲揮而散之悲鬪爭之牢

固也大明不能破長夜之昏慈母不能保身後之子

此下歎悲智與佛同也佛曰雖盛得吾師然後弘益彌多若吾

師者捧佛日而委曲回照疑瞠盡除順佛心而橫亘

大悲窮劫蒙益則世尊爲闡教之主吾師爲會教之

人本末相扶遠近相照可謂畢一代時教之能事矣

自世尊漢教至今日或曰自如來未嘗大都而通之

今一旦違宗趣而不守廢關防而不據無乃乖祕藏
密契之道乎答曰佛於法華涅槃會中亦已融爲一
味但昧者不覺故涅槃經迦葉菩薩曰諸佛有密語
無密藏世尊讚之曰如來之言開發顯露清淨無翳
愚人不解爲之祕藏智者了達則不名藏此其證也
故王道興則外戶不閉而守在我夷佛道備則諸法
總持而防在魔外涅槃圓教和會諸法唯簡別魔說及外道邪宗耳不當復
執情攘臂於其間也嗚呼後之學者當取信於佛無
取信於人當取證於本法無取證於末習都序以佛語印諸宗
以本法照偏說故能如是則不孤圭峯劬勞之德矣
丁寧勸其深信

哀哀父母生我劬勞吾師之德過於人是矣後之人觀其法而不生悲感木石無異且須保重也

禪源諸詮集都序卷上之一

亦名禪那理行諸詮集

唐圭峯山沙門宗密述

禪源諸詮集者。寫錄諸家所述。詮表禪門根源道理。文字句偈。集爲一藏。以貽後代。故都題此名也。禪是天竺之語。具云禪那。中華翻爲思惟修。亦名靜慮。皆定慧之通稱也。源者是一切衆生本覺真性。亦名佛性。亦名心地。悟之名慧。修之名定。定慧通稱爲禪那。此性是禪之本源。故云禪源。亦名禪那。理行者。此之本源是禪理。忘情契之是禪行。故云理行。然今所集

諸家述作多談禪理。少談禪行。故且以禪源題之。今時有但目真性爲禪者。是不達理行之旨。又不辨華竺之音也。然亦非離真性別有禪體。但衆生迷真合塵。卽名散亂。背塵合真。方名禪定。若直論本性。卽非真。非妄。無背無合。無定無亂。誰言禪乎。況此真性。非唯是禪門之源。亦是萬法之源。故名法性。亦是衆生迷悟之源。故名如來藏藏識。山楞伽經亦是諸佛萬德之源。故名佛性。涅槃經亦是菩薩萬行之源。故名心地。梵網經心地法門。品云。是諸佛之本源。是菩薩道之根本。是大衆諸佛子之根本。萬行不出六波羅蜜。禪門但是六中之一。當其第五。豈可都目真

性爲一禪行哉。然禪定一行最爲神妙。能發起性上無漏智慧。一切妙用。萬德萬行。乃至神通光明。皆從定發。故三乘學人。欲求聖道。必須修禪。離此無門。離此無路。至於念佛求生淨土。亦須修十六觀禪。及念佛三昧。般舟三昧。又真性則不垢不淨。凡聖無差。禪則有淺有深。階級殊等。謂帶異計。欣上厭下而修者。是外道禪。正信因果。亦以欣厭而修者。是凡夫禪。悟我空偏真之理而修者。是小乘禪。悟我法二空所顯真理而修者。是大乘禪。上四類皆有四色。四空之異也。若頓悟自心本來清淨。元無煩惱。無漏智性。本自具足。此心卽佛。

畢竟無異。依此而修者是最上乘禪。亦名如來清淨禪。亦名一行三昧。亦名真如三昧。此是一切三昧根本。若能念念修習。自然漸得百千三昧。達摩門下展轉相傳者。是此禪也。達摩未到古來諸家所解。皆是前四禪八定。諸高僧修之。皆得功用。南岳天台令依三諦之理。修三止三觀。教義雖最圓妙。然其趣入門戶次第。亦只是前之諸禪行相。唯達摩所傳者。頓同佛體。迥異諸門。故宗習者難得其旨。得卽成聖。疾證菩提。失卽成邪。速入塗炭。先祖革昧防失。故且人傳一人。後代已有所馮。故任千燈千照。暨乎法久成弊。

錯謬者多。故經論學人疑謗亦衆。原夫佛說頓教漸教。禪開頓門。漸門二教二門。各相符契。今講者偏彰漸義。禪者偏播頓宗。禪講相逢。胡越之隔。宗密不知宿生何作。熏得此心。自未解脫。欲解他縛。爲法忘於軀命。愍人切於神情。亦如淨名云。若自有縛。能解他縛。無有是處。然欲罷不能。驗是宿世難改。每歎人與法差。法爲人病。故別撰經律論疏。大開戒定慧門。顯頓悟資於漸修。證師說符於佛意。意既本末而委示。文乃浩博而難尋。泛學雖多。秉志者少。況迹涉名相。誰辨金鑰。徒自疲勞。未見機感。雖佛說悲增是行。而自慮愛見難防。遂捨衆人山習。定均

慧前後息慮相計十年。

云前後者中間被勅追入內住城三年方却表請歸山也。

微細習情起滅彰於靜慧差別法義羅列見於空心。虛隙日光纖埃擾擾清潭水底影像昭昭豈比夫空守默之癡禪。但尋文之狂慧者。然本因了自心而辨諸教。故懇情於心宗。又因辨諸教而解修心。故虔誠於教義。教也者。諸佛菩薩所留經論也。禪也者。諸善知識所述句偈也。但佛經開張羅大千八部之衆。禪偈撮略就此方一類之機。羅衆則漭蕩難依。就機卽指的易用。今之纂集意在斯焉。問夫言撮略者。文須簡約。義須周足。理應撮束。多義在少文中。且諸佛說。

經皆具法

法義理

因

三賢十地三十品十波羅蜜

果

佛之妙用

信

信解

義解修

歷位

證

證果

雖世界各異化儀不同其所立教無

不備此故華嚴每會每位皆結十方世界悉同此說

今覽所集諸家禪述多是隨問反質旋立旋破無斯

綸緒不見始終豈得名爲撮略佛教答佛出世立教

與師隨處度人事體各別佛教萬代依馮理須委示

師訓在卽時度脫意使玄通玄通必在忘言故言下

不留其迹迹絕於意地理現於心源卽信解修證不

爲而自然成就經律疏論不習而自然冥通故有問

修道卽答以無修有求解脫卽反質誰縛有問成佛

之路。卽云本無凡夫。有問臨終安心。卽云本來無事。或亦云此是妄。此是真。如是用心。如是息業。舉要而言。但是隨當時事。應當時機。何有定法。名阿耨菩提。豈有定行。名摩訶般若。但得情無所念。意無所爲。心無所生。慧無所住。卽真信真解真修真證也。若不了自心。但執名教。欲求佛道者。豈不現見識字看經。元不證悟。銷文釋義。唯熾貪嗔耶。況阿難多聞總持。積歲不登聖果。息緣反照。暫時卽證無生。卽知乘教之益。度人之方。各有其由。不應於文字而責也。問。旣重得意。不貴專文。卽何必纂集此諸句偈。答。集有二意。

一有雖經師授而悟不決究。又不逢諸善知識處處勘契者。今覽之徧見諸師言意以通其心。以絕餘念。二爲悟解了者。欲爲人師。令廣其見聞。增其善巧。依解攝衆。答問教授也。卽上云羅千界卽滂蕩難依。就一方卽指的易用也。然又非直資忘言之門。亦兼垂禪教之益。非但令意符於佛。亦欲使文合於經。旣文似乖而令合實爲不易。須判一藏經大小乘權實理了義不了義。方可印定諸宗禪門各有旨趣。不乖佛意也。謂一藏經論統唯三種禪門言教。亦統唯三宗。

各在下
文別釋

配對相符。方成圓見。問今習禪詮何關經論。

答有十。所以須知經論權實。方辨諸禪是非。又須識禪心性。相方解經論理事。一師有本末。馮本印末故。二禪有諸宗。互相違阻故。三經如繩墨。楷定邪正故。四經有權實。須依了義故。五量有三種。勘契須同故。六疑有多般。須具通決故。七法義不同。善須辨識故。八心通性相。名同義別故。九悟修頓漸。言似違反故。十師授方便。須識藥病故。初言師有本末者。謂諸宗始祖。卽是釋迦。經是佛語。禪是佛意。諸佛心口必不相違。諸祖相承根本。是佛親付菩薩。造論始末。唯弘佛經。況迦葉乃至耆多。弘傳皆兼三藏。提多迦已下。

因僧諍律教。別行罰賈國已來。因王難經論分化。中間馬鳴龍樹。悉是祖師。造論釋經。數千萬偈。觀風化物。無定事儀。未有講者。毀禪。禪者毀講。達摩受法。天竺躬至中華。見此方學人。多未得法。唯以名數爲解。事相爲行。欲令知月不在指。法是我心。故但以心傳心。不立文字。顯宗破執。故有斯言。非離文字說解脫也。故教授得意之者。卽頻讚金剛楞伽云。此二經是我心要。今時弟子。彼此迷源。修心者以經論爲別宗。講說者以禪門爲別法。聞談因果。修證便推屬經論之家。不知修證正是禪門之本事。聞說卽心卽佛。便

推屬實襟之禪不知心佛正是經論之本意

前叙有人難云

禪師何得講說余今以此答也

今若不以權實之經論對配深淺禪

宗焉得以教照心以心解教二禪有諸宗互相違反者今集所述殆且百家宗義別者猶將十室謂江西荷澤北秀南旻牛頭石頭保唐宣什及稠那天台等立宗傳法互相乖阻有以空爲本有以知爲源有云寂默方真有云行坐皆是有云見今朝暮分別爲作一切皆妄有云分別爲作一切皆真有萬行悉存有兼佛亦泯有放任其志有拘束其心有以經律爲所依有以經律爲障道非唯汎語而乃確言確弘其宗

確毀餘類爭得和會也。問是者卽收。非者卽揀。何須
委曲和會。答或空或有。或性或相。悉非邪僻。但緣各
皆黨已爲是。斥彼爲非。彼此確定。故須和會。問旣皆
非邪。卽各任確定。何必會之。答至道歸一。精義無二。
不應兩存。至道非邊了義。不偏不應單取。故必須會
之爲一。令皆圓妙。問以氷雜火。勢不俱全。將矛刺盾。
功不雙勝。諸宗所執旣互相違。一是則有一非。如何
會令皆妙。答俱存其法。俱遣其病。卽皆妙也。謂以法
就人。卽難以人就法。卽易人多隨情互執。執卽相違。
誠如氷火相和。矛盾相敵。故難也。法本稱理互通。通

卽互順自然凝流皆水。鑲釧皆金。故易也。舉要而言。局之則皆非。會之則皆是。若不以佛語各示其意。各收其長。統爲三宗。對於三教。則何以會爲一代善巧。俱成要妙法門。各忘其情。同歸智海。唯佛所說卽異。而同故約佛經爲一二三。經如繩墨。指定邪正者。繩墨非巧工巧者。必以繩墨爲憑。經論非禪。傳禪者。必以經論爲準。中下根者。但可依師。師自觀根。隨分指授。上根之輩。悟須圓通。未究佛言。何同佛見。問所在。皆有佛經。任學者轉讀勘會。今集禪要。何必辨經。答此意。卽其次之文。便是答此問也。四經有權實。須依了義者。謂佛說諸

經有隨自意語。有隨他意語。有稱畢竟之理。有隨當時之機。有詮性相。有頓漸大小。有了義。不了義。文或敵體相違。義必圓通。無尋龍藏。浩汗何見。旨歸故今。但以十餘紙。都決擇之。今一時圓見佛意。見佛意後。卽備尋一藏。卽句句知宗。五量有三種。勘契須同者。西域諸賢聖所解法義。皆以三量爲定。一比量。二現量。三佛言量。量者。如度量升斗。量物知定也。比量者。以因由譬喻比度也。如遠見煙。必知有火。雖不見火。亦非虛妄。現量者。親自現見。不假推度。自然定也。佛言量者。以諸經爲定也。勘契須同者。若但憑佛語。不

自比度。證悟自心者。只是泛信於已未益。若但取現
量自見爲定。不勘佛語焉。知邪正。外道六師親見所
執之理。修之亦得功用。自謂爲正。豈知是邪。若但用
比量者。旣無聖教及自所見約。何比度。比度何法。故
須三量勘同。方爲決定。禪宗已多有現比二量。今更
以經論印之。則三量備矣。六疑有多般。須具通決者。
數十年中。頻有經論大德問余曰。四禪八定皆在上
界。此界無禪。凡修禪者。須依經論引取上界禪定。而
於此界修習。修習成者。皆是彼禪。諸教具明。無出此
者。如何離此別說禪門。旣不依經。卽是邪道。又有問

陳
列
之

曰經云漸修祇劫方證菩提禪稱頓悟剎那便成正覺經是佛語禪是僧言違佛遵僧竊疑未可又有問曰禪門要旨無是無非塗割怨親不嗔不喜何以南能北秀水火之嫌荷澤洪州參商之隙又有問曰六代禪宗師資傳授禪法皆云內授密語外傳信衣衣法相資以爲符印曹溪已後不聞此事未審今時化人說密語否不說則所傳者非達摩之法說則聞者盡合得衣又有禪德問曰達摩傳心不立文字汝何違背先祖講論傳經近復問曰淨名已呵宴坐荷澤每斥疑心曹溪見人結跏曾自將杖打起今問汝每

因教誠卽勸坐禪禪菴羅列徧於巖壑乖宗違祖吾
竊疑焉余雖隨時各已酬對然疑者千萬愍其未聞
況所難之者情皆偏執所執各異彼此互違因決申
疑復增已病故須開三門義評一藏經總答前疑無
不通徹

下隨相當文義一一脚注指之答此諸難欲見答處須檢注文也

七法義不

同善須辨識者凡欲明解諸法性相先須辨得法義
依法解義義卽分明以義詮法法卽顯著今且約世
物明之如真金隨工匠等緣作鑲釧椀盞種種器物
金性必不變爲銅鐵金卽是法不變隨緣是義設有
人問說何物不變何物隨緣只合答云金也以喻一

藏經論義理只是說心心卽是法一切是義故經云
無量義者從一法生然無量義統唯二種一不變二
隨緣諸經只說此心隨迷悟緣成垢淨凡聖煩惱菩
提有漏無漏等亦只說此心垢淨等時元來不變常
自寂滅真實如如等設有人問說何法不變何法隨
緣只合答云心也不變是性隨緣是相當知性相皆
是一心上義今性相二宗互相非者良由不識真心
每聞心字將謂只是八識不知八識但是真心上隨
緣之義故馬鳴菩薩以一心爲法以真如生滅二門
爲義論云依於此心顯示摩訶衍義心真如是體心

生滅是相用只說此心不虛妄故云真不變易故云
如是以論中一一云心真如心生滅今時禪者多不
識義故但呼心爲禪講者多不識法故但約名說義
隨名生執難可會通聞心爲淺聞性謂深或却以性
爲法以心爲義故須約三宗經論相對照之法義旣
顯但歸一心自然無諍入心通性相名同義別者諸
經或毀心是賊制令斷除或讚心是佛勸令修習或
云善心惡心淨心垢心貪心嗔心慈心悲心或云託
境心生或云心生於境或云寂滅爲心或云緣慮爲
心乃至種種相違若不以諸宗相對顯示則看經者

何以辨之爲當有多種心爲復只是一般心耶今且

略示名體汎言心者略有四種梵語各別翻譯亦殊

一。紇利陀耶此云肉團心此是身中五藏心也具如黃庭

經五藏論說也二。緣慮心此是八識俱能緣慮自分境故是

眼識境乃至根身種子器世界是阿賴耶識之境各緣一分故云自分此八各有心所

善惡之殊諸經之中目諸心所總名心也謂善心惡

心等三質多耶此云集起心唯第八識積集種子生

起現行故黃庭經五藏論曰之爲神西國外道計之爲我皆是此識四。乾栗陀耶

此云堅實心亦云真實心此是真心也然第八識無

別自體但是真心以不覺故與諸妄想有和合不和

合義和合義者能含染淨目爲藏識不和合者體常
不變目爲真如都是如來藏故楞伽云寂滅者名爲
一心一心者卽如來藏如來藏亦是在纏法身如勝
鬘經說故知四種心本同一體故密嚴經云佛說如
來藏法身在纏之名以爲阿賴耶藏惡慧不能知藏卽賴耶
識有執真如與賴耶體別者是惡慧如來清淨藏世間阿賴耶如金
與指鑲展轉無差別指鑲等喻賴耶金喻真如都名如來藏然雖同體
真妄義別本末亦殊前三是相後一是性依性起相
蓋有因由會相歸性非無所以性相無碍都是一心
迷之卽觸面向墻悟之卽萬法臨鏡若空尋文句或

信胷襟於此一心性相如何了會九悟修頓漸似反而符者謂諸經論及諸禪門或云先因漸修功成豁然頓悟或云先須頓悟方可漸修或云由頓修故漸悟或云悟修皆漸或云皆頓或云法無頓漸頓漸在機如上等說各有意義言似反者謂既悟卽成佛本無煩惱名爲頓者卽不應修斷何得復云漸修漸修卽是煩惱未盡因行未圓果德未滿何名爲頓頓卽非漸漸卽非頓故云相反如下對會卽頓漸非唯不相乖反而乃互相資也十師資傳授須識藥病者謂承上傳授方便皆先開示本性方令依性修禪性不

易悟多由執相故欲顯性先須破執破執方便須凡
聖俱泯功過齊祛戒卽無犯無持禪卽無定無亂三
十二相都是空花三十七品皆爲夢幻意使心無所
著方可修禪後學淺識便但只執此言爲究竟道又
以修習之門人多放逸故復廣說欣厭毀責貪恚讚
歎勤儉調身調息麤細次第後人聞此又迷本覺之
用便一向執相唯根利志堅者始終事師方得悟修
之旨其有性浮淺者纔聞一意卽謂已足仍恃小慧
便爲人師未窮本末多成偏執故頓漸門下相見如
仇讎南北宗中相敵如楚漢洗足之誨摸象之喻驗

於此矣今之所述豈欲別爲一本集而會之務在伊
圓三點三點各別既不成伊三宗若乖焉能作佛故
知欲識傳授藥病須見三宗不乖須解三種佛教前
有人難云禪師何得講說余今總以此十意
答也故初已叙西域祖師皆弘經論耳也
禪源諸詮集都序卷上之一

徽州居士吳繼勲慕教門之廣大愍末法之衰
頽施貲刻此
禪源諸詮集卷上之二願蚤悟一乘深證佛
果揚教海之波瀾徧周沙界作人天之眼目廣
度含靈者
平湖釋在照對南呂萬承明書涇縣汪文旦刻
萬曆丁未十一月寂照庵識

禪源諸詮集都序卷上之二

唐圭峯山沙門宗密述

上來十意理例昭然但細對詳禪之三宗教之三
種如經斗稱足定淺深先叙禪門後以教證禪三
宗者一息妄修心宗二泯絕無寄宗三直顯心
性宗教三種者一密意依性說相教二密意破相
顯性教三顯示真心卽性教右此三教如次同前
三宗相對一一證之然後總會爲一味今且先叙
禪宗初息妄修心宗者說衆生雖本有佛性而
無始無明覆之不見故輪迴生死諸佛已斷妄
想故見性了了出離生死神

通自在當知凡聖功用不同外境內心各有分限故
須依師言教背境觀心息滅妄念念盡卽覺悟無所
不知如鏡昏塵須勤勤拂拭塵盡明現卽無所不照
又須明解趣入禪境方便遠離憤鬧住閑靜處調身
調息跏趺宴默舌拄上腭心注一境南旡北秀保唐
宣什等門下皆此類也牛頭天台惠稠求那等進趣
方便迹卽大同見解卽別二泯絕無寄宗者說凡聖
等法皆如夢幻都無所有本來空寂非今始無卽此
達無之智亦不可得平等法界無佛無衆生法界亦
是假名心旣不有誰言法界無修不修無佛不佛設

有一法勝過涅槃我說亦如夢幻無法可拘無佛可
作凡有所作皆是迷妄如此了達本來無事心無所
寄方免顛倒始名解脫石頭牛頭下至徑山皆示此
理便令心行與此相應不令滯情於一法上日久功
至塵習自亡則於怨親苦樂一切無碍因此便有一
類道士儒生閑僧汎叅禪理者皆說此言便爲臻極
不知此宗不但以此言爲法荷澤江西天台等門下
亦說此理然非所宗三直顯心性宗者說一切諸法
若有若空皆唯真性真性無相無爲體非一切謂非
凡非聖非因非果非善非惡等然卽體之用而能造

作種種謂能凡能聖現色現相等於中指示心性復有二類一云卽今能語言動作貪嗔慈忍造善惡受苦樂等卽汝佛性卽此本來是佛除此無別佛也。此天真自然故不可起心修道道卽是心不可將心還修於心惡亦是心不可將心還斷於心不斷不修任運自在方名解脫性如虛空不增不減何假添補但隨時隨處息業養神聖胎增長顯發自然神妙此卽是爲真悟真修真證也。二云諸法如夢諸聖同說故妄念本寂塵境本空空寂之心靈知不昧卽此空寂之知是汝真性任迷任悟心本自知不藉緣生不

因境起。知之一字。衆妙之門。由無始迷之。故妄執身
心爲我。起貪嗔等念。若得善友開示。頓悟空寂之知。
知且無念。無形誰爲我相。人相覺。諸相空。心自無念。
念起卽覺。覺之卽無。修行妙門。唯在此也。故雖備修
萬行。唯以無念爲宗。但得無念。知見則愛惡自然。淡
泊悲智自然。增明罪業自然。斷除功行自然。增進旣
了。諸相非相。自然無修之修。煩惱盡時。生死卽絕。生
滅滅已。寂照現前。應用無窮。名之爲佛。然此兩家。皆
會相歸性。故同一宗。然上三宗中。復有遵教慢教。隨
相毀相。拒外難之門戶。接外衆之善巧。教弟子之儀。

軌種種不同皆是二利行門各隨其便亦無所失但
所宗之理即不合有二故須約佛和會也次下判佛
教總爲三種者一密意依性說相教

佛見三界六道悉是真性之相

但是衆生迷性而起無別自體故云依性然根鈍者
卒難開悟故且隨他所見境相說法漸度故云說相
說未彰顯故云密意也此一教中自有三類一人天因果教說

善惡業報令知因果不差懼三途苦求人天樂修施
戒禪定等一切善行得生人道天道乃至色界無色
界此名人天教二說斷惑滅苦樂教說三界不安皆
如火宅之苦令斷業惑之集修道證滅以隨機故所
說法數一向差別以揀邪正以辨凡聖以分忻厭以

明因果說衆生五蘊都無我主但是形骸之色思慮

之心從無始來因緣力故念念生滅相續無窮如水

涓涓如燈焰焰身心假合似一似常凡愚不覺執之

爲我寶此我故卽起貪貪名利榮我嗔嗔違情境恐侵損我癡癡錯解

非理計較等三毒三毒擊於意識發動身口造一切業業

成難逃影隨形響應聲故受五道苦樂等身此是別業所感三界勝

劣等處所居處此是共業所感於所受身還執爲我還起貪等

造業受報身則生老病死死而還生界則成住壞空

空而復成劫劫生生輪迴不絕無始無終如級井輪

都由不了此身本不是我此上皆是前人天教中世界因果也前但令厭下忻

上未說三界皆可厭患又未破我今具說之即苦集二諦也下破我執令修滅道二諦明出世因果故名

四諦不是我者此身本因色心和合為相今推尋分

析色有地水火風之四類心有受領納好惡之事想取像行造作

一識了別之四類此四與色部名五蘊若皆是我即成八我況

色中復有三百六十段骨段段各別皮毛筋肉肝心

肺腎各不相是皮不是毛等諸心數等亦各不同見不是

聞喜不是怒既有此眾多之物不知定取何者為我

若皆是我我即百千一身之中多主紛亂離此之外

復無別法翻覆推我皆不可得便悟此身心等但是

眾緣似和合相元非一體似我人相元非我人為誰

貪嗔爲誰煞盜誰修戒施誰生人天集知苦也遂不滯心

於三界有漏善惡斷集諦也但修無我觀智道諦以斷貪等

止息諸業證得我空真如得須陀洹果乃至滅盡患

累得阿羅漢果滅諦灰身滅智永離諸苦諸阿含等六百一十八卷

經婆沙俱舍等六百九十八卷論皆唯說此三將識

破境教說前所說境相若起若滅非唯無我亦無如

也說上生滅等法不關真如但各是衆生無始已來

法爾有八種識於中第八藏識是其根本頓變根身

器界種子轉生七識各能變現自分所緣眼緣色乃至七緣八

見八緣根此八識外都無實法問如何變耶答我法

分別熏習力故諸識生時變似我法六七二識無明

覆故緣此執爲實我實法如患

病重心昏見異色人物

夢夢相所見

可者患夢力故心似種種外境相現夢時執爲實有

外物寤來方知唯夢所變我此身相及於外境亦復

如是唯識所變迷故執有我及諸境既悟本無我法

唯有心識遂依此二空之智修唯識觀及六度四攝

等行漸漸伏斷煩惱所知二障證二空所顯真如十

地圓滿轉八識成四智菩提也真如障盡成法性身

大涅槃也解深密等數十本經瑜伽唯識數百卷論

所說之理不出此也此上三類都爲第一密意依性

說相教然唯第三將識破境教與禪門息妄修心宗而相扶會以知外境皆空故不修外境事相唯息妄修心也息妄者息我法之妄修心者修唯識之心故同唯識之教既與佛同如何毀他漸門息妄看淨時時拂拭凝心住心專注一境及跏趺調身調息等也此等種種方便悉是佛所勸讚淨名云不必坐不必不坐坐與不坐任逐機宜凝心運心各量習性當高宗大帝乃至玄宗朝時圓頓本宗未行北地唯神秀禪師大揚漸教爲二京法主三帝門師全稱達摩之宗又不顯卽佛之旨曹溪荷澤恐圓宗滅絕遂呵毀

住心伏心等事但是除病非除法也況此之方便本是五祖大師教授各皆印可爲一方師達摩以壁觀教人安心外止諸緣內心無喘心如墻壁可以入道豈不正是坐禪之法又廬山遠公與佛陀耶舍二梵僧所譯達摩禪經兩卷具明坐禪門戶漸次方便與天台及旣秀門下意趣無殊故四祖數十年中脇不至席卽知了與不了之宗各由見解深淺不以調與不調之行而定法義偏圓但自隨病對治不須讚此毀彼

此法通前叙有人問難余云何以勸坐禪者余今以此答也

二密意破相顯

性教

據真實了義卽妄執本空更無可破無漏諸法本足眞性隨緣妙用永不斷絕又不應破但爲

類衆生執虛妄相障真實性難得玄悟故佛且不
淨善惡垢淨性相一切呵破以真性及妙用不無而
且云無故云密意又意在顯性語說前教中所變之
乃破相意不形於言中故云密也境既皆虛妄能變之識豈獨真實心境互依空而似
有故也且心不孤起託境方生境不自生由心故現
心空卽境謝境滅卽心空未有無境之心曾無無心
之境如夢見物似能見所見之殊其實同一虛妄都
無所有諸識諸境亦復如是以皆假託衆緣無自性
故未曾有一法不從因緣生是故一切法無不是空
者凡所有相皆是虛妄是故空中無色無眼耳鼻舌
身意無十八界無十二因緣無四諦無智亦無得無

業無報無修無證生死涅槃平等如幻但以不住一切無執無著而爲道行諸部般若千餘卷經及中百

門等三論廣百論等皆說此也

智度論百卷亦說此理但論主通達不挑

故該收大小乘法相

此教與禪門泯絕無寄宗全同

既同世尊所說菩薩所弘云何漸門禪主及講習之徒每聞此說卽謗云撥無因果佛自云無業無報豈邪見乎若云佛說此言自有深意者豈禪門此說無深意耶若云我曾推徵覺無深意者自是汝遇不解之流但可嫌人豈可斥法此上一教據佛本意雖不相違然後學所傳多執文迷旨或各執一見彼此相

非或二皆泛信渾沌不曉故龍樹提婆等菩薩依破
相教廣說空義破其執有令洞然解於真空真空者
是不違有之空也無著天親等菩薩依唯識教廣說
名相分析性相不同泐淨各別破其執空令歷然解
於妙有妙有者是不違空之有也雖各述一義而舉
體圓具故無違也問若爾何故已後有清辨護法等
諸論師互相破耶答此乃是相成不是相破何者以
末學人根器漸鈍互執空有故清辨等破定有之相
令盡徹至畢竟真空方乃成彼緣起妙有護法等破
斷滅偏空意存妙有妙有存故方乃是彼無性真空

文卽相破意卽相成

叙前疑南北禪門相競今於此決也

由妙有真空

有二義故一極相違義謂互相害全奪永盡二極相順義謂冥合一相舉體全攝若不相奪全盡無以舉體全收故極相違方極順也龍樹無著等就極順門故相成清辨護法等據極違門故相破違順自在成破無碍卽於諸法無不和會耳哀哉此方兩宗後學經論之者相非相斥不異仇讐何時得證無生法忍今頓漸禪者亦復如是努力通鑒勿偏局也問西域先賢相破既是相成豈可此方相非便成相嫉答如人飲水冷暖自知各各觀心各各察念留藥防病不

爲健人立法防奸不爲賢士三顯示真心卽性教

自心卽是真性不約事相而示亦不約心相而示故云卽性不是方便隱密之意故云顯示也此教

說一切衆生皆有空寂真心無始本來性自清淨

斷惑成淨故云性淨實性論云清淨有二一自性清淨二離垢清淨勝鬘云自性清淨心難可了知此心

爲煩惱所染亦難可了知釋云此心超明明不昧了

了常知佛說盡未來際常住不滅名爲佛性亦名如

來藏亦名心地達摩所傳是此心也從無始際妄想翳之不自

證得耽著生死大覺愍之出現於世爲說生死等法

一切皆空開示此心全同諸佛如華嚴經出現品云

佛子無一衆生而不具有如來智慧但以妄想執著

而不證得若離妄想一切智自然智無礙智即得現

前譬如大經卷

喻佛智慧

量等三千大千世界

智體無邊

法界

書寫三千大千世界中事一切皆盡

喻體上本有恒沙功德恒

沙妙用也

此大經卷雖復量等大千世界而全住在一微

塵中

喻佛智全在衆生身中圓滿具足也

如一微塵

舉一衆生爲例

一切微塵

皆亦如是時有一人智慧明達

喻世尊也

具足成就清淨

天眼見此經卷在微塵內

天眼力隔障見色喻佛眼力隔煩惱見佛智也於

諸衆生無少利益

喻迷時都不得其用與無不別

起方便破彼微

塵

喻說法除障

出此大經卷令諸衆生皆得饒益

云云

至如來智慧亦復如是無量無碍普能利益一切衆

生

合書寫三千世界事

具足在於衆生身中

合微塵中

但諸凡愚妄

想執著不知不覺不得利益爾時如來以無障礙清

淨智眼普觀法界一切衆生而作是言奇哉奇哉此

諸衆生云何具有如來智慧愚癡迷惑不知不見我

當教以聖道令其永離妄想執著自於身中得見如

來廣大智慧與佛無異卽教彼衆生修習聖道

六波羅蜜

三十七道品等

令離妄想離妄想已證得如來無量智慧利

益安樂一切衆生問上旣云性自了了常知何須諸

佛開示答此言知者不是證知意說真性不同虛空

木石故云知也非如緣境分別之識非如照體了達

之智直是一真如之性自然常知故馬鳴菩薩云真如者自體真實識知華嚴迴向品亦云真如照明爲性又據問明品說知與智異智局於聖不通於凡知卽凡聖皆有通於理智故覺首等九菩薩問文殊師利言云何佛境界智證悟之智云何佛境界知本有真心文殊答智云諸佛智自在三世無所碍過去未來現在事無不了達故自在無碍答知云非識所能識不可識識者以識屬分別分別即非真知真知唯無念方見也亦非心境界不可以智知謂若以智證之卽屬所證之境真知非境界故不可以智證瞥起照心卽非真知也故經云自心取自心非幻法論云心不見心荷澤大師云擬心卽差故北宗看心是失真盲心若看卽其性本清淨不待離垢是境界故此云非心境界惑方淨不

待斷疑濁方清故云本清淨也就寶性論中即開示

諸羣生以既云本淨不待斷障即知羣生本來皆有但

華中開示悟入佛之知見如上所引佛本出世只為

此事也彼云使得清淨者即寶性中離垢清淨也此

心雖自性清淨終須悟修方得性相圓淨故數十本

經論皆說二種清淨二種解脫今時學淺之人或只

知離垢清淨離垢淨解脫故毀禪門即心即佛或只

知自性清淨淨性淨解脫故輕於教相斥於持律坐禪

調伏等行不知必須頓悟自性清淨淨性自解脫漸修

令得離垢清淨離障解脫成圓滿清淨究竟解脫若

身若心無所壅寶藏論亦云知有有壞知無無敗此

能知有真知之知有無不計性既無分別之知如是

無之智開示靈知之心即是真性與佛無異故顯示真心即

性教也華嚴密嚴圓覺佛頂勝鬘如來藏法華涅槃

等四十餘部經寶性佛性起信十地法界涅槃等十
五部論雖或頓或漸不同據所顯法體皆屬此教全
同禪門第三直顯心性之宗既馬鳴標心爲本源文
殊揀知爲真體如何破相之黨但云寂滅不許真知
說相之家執凡異聖不許卽佛今約佛教判定正爲
斯人故前叙西域傳心多兼經論無二途也但以此
方迷心執文以名爲體故達摩善巧揀文傳心標舉
其名心是名也默示其體如是心也喻以壁觀如上所叙令絕諸緣
問諸緣絕時有斷滅否答雖絕諸念亦不斷滅問以
何證驗云不斷滅答了了自知言不可及師卽印云

只此是自性清淨心更勿疑也若所答不契卽但遮諸非更令觀察畢竟不與他先言知字直待自悟方驗實是親證其體然後印之令絕餘疑故云默傳心印所言默者唯默知字非總不言六代相傳皆如此也至荷澤時他宗競播欲求默契不遇機緣又思惟達摩懸絲之記達摩云我法第六代後命如懸絲恐宗旨滅絕遂明言知之一字衆妙之門任學者悟之淺深且務圖宗敎不斷亦是此國大法運數所至一類道俗合得普聞故感應如是其默傳者餘人不知故以袈裟爲信其顯傳者學徒易辨但以言說除疑況旣形言足可

引經論等爲證

前叙外難云今時傳法者說密語否今以此答也法是達摩之法故聞者

淺深皆益但昔密而今顯故不問悟此心已如何修

名密語豈可名別法亦別耶

問悟此心已如何修

之還依初說相教中令坐禪否答此有二意謂昏沉
厚重難可策發掉舉猛利不可抑伏貪嗔熾盛觸境
難制者卽用前教中種種方便隨病調伏若煩惱微
薄慧解明利卽依本宗本教一行三昧如起信云若
修止者住於靜處端身正意不依氣息形色乃至唯
心無外境界金剛三昧經云禪卽是動不動不禪是
無生禪法句經云若學諸三昧是動非坐禪心隨境
界流云何名爲定淨名云不起滅定現諸威儀

行住坐臥

不於三界現身意是爲宴坐佛所印身據此卽以答

三界空花四生夢寐依體起行修而無修尚不住佛

不住心誰論上界下界

前叙難云據教須引上界定者以管窺天但執宗之說

見此了教理應懷慚而退

然此教中以一真心性對滌淨諸法全

棟全收全棟者如上所說但尅體直指靈知卽是心

性餘皆虛妄故云非識所識非心境等乃至非性非

相非佛非衆生離四句絕百非也全收者滌淨諸法

無不是心心迷故妄起惑業乃至四生六道雜穢國

界心悟故從體起用四等六度乃至四辨十力妙身

淨刹無所不現既是此心現起諸法諸法全卽真心

如人夢所現事事皆人如金作器器皆金如鏡
現影影皆鏡夢對妄想業報器喻修行影喻應化故華嚴云知一切
法卽心自性成就慧身不由他悟起信論云三界虛
僞唯心所作離心則無六塵境界乃至一切分別卽
分別自心心不見心無相可得故一切法如鏡中相
楞伽云寂滅者名爲一心一心者名如來藏能徧興
造一切趣生造善造惡受苦受樂與因俱故知一切
無非心也全棟門攝前第二破相教全收門攝前第
一說相教將前望此此則迥異於前將此攝前前則
全同於此深必該淺淺不至深深者直顯出真心之

體方於中揀一切收一切也如是收揀自在性相無碍方能於一切法悉無所住唯此名爲了義更有心性同異頓漸違妨及所排諸家言教部帙次第述作大意悉在下卷

禪源諸詮集都序卷上之二

徽州居士吳繼勳慕教門之廣大愍末法之衰頽施貲刻此禪源諸詮集卷上之二願蚤悟一乘深證佛果揚教海之波瀾徧周沙界作人天之眼目廣度含靈者平湖釋在照對南昌萬承明書江寧羅仕顯刻萬曆丁未十一月寂照庵識

禪源諸詮集都序卷下之一

唐圭峯山沙門宗密述

上之三教攝盡佛一代所說之經及諸菩薩所造之論細尋法義便見三義全殊一法無別就三義中第一第二空有相對第三第一性相對皆條然易見唯第二第三破相與顯性相對講者禪者同迷皆謂同是一宗一教皆以破相便爲真性故今廣辨空宗性宗有其十異一法義真俗異二心性二名異三性字二體異四真智真知異五有我無我異六遮詮表詮異七認名認體異八二諦三諦異九三性空有異

十佛德空有異初法義真俗異者空宗緣未顯真靈之性故但以一切差別之相爲法法是俗諦照此諸法無爲無相無生無滅無增無減等爲義義是真諦故智度論以俗諦爲法無尋辯以真諦爲義無尋辯性宗則以一真之性爲法空有等種種差別爲義故經云無量義者從一法生華嚴十地亦云法者知自性義者知生滅法者知真諦義者知俗諦法者知一乘義者知諸乘如是十番釋法義二無尋義皆以法爲真諦以義爲俗諦二心性二名異者空宗一向目諸法本源爲性性宗多目諸法本源爲心目爲性者

諸論多同不必叙述目爲心者勝鬘云自性清淨心起信云一切法從本以來離言說名字心緣等相乃至唯是一心楞伽云堅實心良由此宗所說本性不但空寂而乃自然常知故應目爲心也三性字二體異者空宗以諸法無性爲性性宗以靈明常住不空之體爲性故性字雖同而體異也四真智真知異者空宗以分別爲知無分別爲智智深知淺性宗以能證聖理之妙慧爲智以該於理智通於凡聖之靈性爲知知通智局上引問明品已自分別況十迴向品說真如云照明爲性起信說真如自體真實識知五

有我無我異者空宗以有我爲妄無我爲真性宗以
無我爲妄有我爲真故涅槃經云無我者名爲生死
有我者名爲如來又云我計無我是顛倒法乃至廣
破二乘無常無我之見如春池執礫爲寶廣讚常樂
我淨而爲究竟乃至云無我法中有真我良由衆生
迷自真我
妄執五蘊爲我故佛於大小乘法相及破相教中
破之云無今於性宗直明實體故顯之云有也六
遮詮表詮異者遮謂遣其所非表謂顯其所是又遮
者揀却諸餘表者直示當體如諸經所說真妙理性
每云不生不滅不垢不淨無因無果無相無爲非凡
非聖非性非相等皆是遮詮諸經論中每以非字非
却諸法動卽有三十五

十箇非字也不字無字亦爾故云絕百非

若云知見覺照靈鑒光明朗朗昭昭惺惺寂寂等皆是表詮若無知見等體顯何法爲性說何法不生滅等必須認得見今了然而知卽是心性方說此知不生不滅等如說鹽云不淡是遮云鹹是表說水云不乾是遮云濕是表諸教每云絕百非者皆是遮詞直顯一真方爲表語空宗之言但是遮詮性宗之言有遮有表但遮者未了兼表者乃的今時學人皆謂遮言爲深表言爲淺故唯重非心非佛無爲無相乃至一切不可得之言良由但以遮非之詞爲妙不欲親自證認法體故如此也

悟息後卽任遮

表臨時七認名認體異者謂佛法世法一一皆有名體

且如世間稱大不過四物如智論云地水火風是四

物名堅濕暖動是四物體今且說水設有人問每聞

澄之卽清混之卽濁堰之卽止決之卽流而能溉灌

萬物洗滌萬穢此是何物舉功能義答云是水答名

愚者認名便謂已解智者應更問云何者是水微其

答云濕卽是水尅體指也此一言便定更無別字可

他所問佛法亦爾設有人問每聞諸經云迷之卽垢

悟之卽淨縱之卽凡修之卽聖能生世間出世間一

切諸法此是何物舉功能義答云是心舉名愚者認

用而問也

答云是心

答也

愚者認

名便謂已識智者應更問何者是心

徵其體也

答知卽是

心

指其體也此言最的餘字不如若云非性非相能語言運動等是心者何異他所問詞也

以此

而推水之名體各唯一字餘皆義用心之名體亦然濕之一字貫於清濁等萬用萬義之中知之一字亦貫於貪嗔慈忍善惡苦樂萬用萬義之處今時學禪人多疑云達摩但說心荷澤何以說知如此疑者豈不似疑云比只聞井中有水云何今日忽覺井中濕耶思之思之直須悟得水 is 名不是濕濕是水不是名卽清濁水波凝流無義不通也以例心是名不是知知是心不是名卽真妄垢淨善惡無義不通也空

宗相宗爲對初學及淺機恐隨言生執故但標名而遮其非唯廣以義用而引其意性宗對久學及上根令忘言認體故一言直示

達摩云指一言以直示後人意不解尋思何者是一

言若云卽心是佛是一言者此是四言何爲名一也認得體已方於體上照察

義用故無不通矣八二諦三諦異者空宗所說世出世間一切諸法不出二諦學者皆知不必引釋性宗則攝一切性相及自體總爲三諦以緣起色等諸法爲俗諦緣無自性諸法卽空爲真諦

此與空宗相宗一諦義無別也

一真心體非空非色能空能色爲中道第一義諦其猶明鏡亦具三義鏡中影像不得呼青爲黃妍媸各

別如俗諦影無自性一一全空如真諦其體常明非
空非青黃能空能青黃如第一義諦具如瓔珞大品
本業等經所說故天台宗依此三諦修三止三觀成
就三德也九三性空有異者三性謂徧計所執性妄情
於我及一切法周徧計度一一執爲實有如依他起
癡孩鏡中見人面像執爲有命質尋骨肉等依他起
性此所執法依他衆緣相因而起都圓成實性本覺
始覺顯現圓滿成就空宗云諸經每說有者卽約徧
眞實常住如鏡之明空宗云諸經每說有者卽約徧
計依他每說空者卽是圓成實性三法皆無性也性
宗卽三法皆具空有之義謂徧計情有理無依他相
有性無圓成情無理有相無性有十佛德空有異者

空宗說佛以空爲德無有少法是名菩提色見聲求
皆行邪道中論云非陰不離陰此彼不相在如來不
有陰何處有如來離一切相卽名諸佛性宗則一切
諸佛自體皆有常樂我淨十身十智真實功德相好
通光一一無盡性自本有不待機緣十異歷然二門
煥矣雖分教相亦勿滯情三教三宗是一味法故須
先約三種佛教證三宗禪心然後禪教雙忘心佛俱
寂俱寂卽念念皆佛無一念而非佛心雙忘卽句句
皆禪無一句而非禪教如此則自然聞泯絕無寄之
說知是破我執情聞息妄修心之言知是斷我習氣

執情破而真性顯卽泯絕是顯性之宗習氣盡而佛
道成卽修心是成佛之行頓漸空有旣無所乖荷澤
江西秀能豈不相契若能如是通達則爲他人說無
非妙方聞他人說無非妙藥藥之與病只在執之與
通故先德云執則字字瘡疣通則文文妙藥通者了
三宗不相違也問前云佛說頓教漸教禪開頓門漸
門未審三種教中何頓何漸答法義深淺已備盡於
三種但以世尊說時儀式不同有稱理頓說有隨機
漸說故復名頓教漸教非三教外別有頓漸漸者爲
中下根卽時未能信悟圓覺妙理者且說前人天小

乘乃至法相

上皆第一教也

破相

第二教也

待其根器成熟方爲

說於了義卽法華涅槃等經是也

此及下逐機頓教合爲第三教也其

化儀頓卽總攝三般西域此方古今諸德所判教爲三時五時者但是漸教一類不攝華嚴經等

者復二一逐機頓二化儀頓逐機頓者遇凡夫上根

利智直示真法聞卽頓悟全同佛果如華嚴中初發

心時卽得阿耨菩提圓覺經中觀行成時卽成佛道

然始同前二教中行門漸除凡習漸顯聖德如風激

動大海不能現像風若頓息則波浪漸停影像漸顯

也

風喻迷情海喻心性波喻煩惱影喻功用起信論中一一配合

卽華嚴一分及圓

覺佛頂密嚴勝鬘如來藏之類二十餘部經是也遇

機卽說不定初後與禪門第三直顯心性宗全相同也二化儀頓謂佛初成道爲宿世緣熟上根之流一時頓說性相理事衆生萬惑菩薩萬行賢聖地位諸佛萬德因該果海初心卽得菩提果徹因源位滿猶稱菩薩此唯華嚴一經及十地論名爲圓頓教餘皆不備

前叙外難云頓悟成佛是違經者余今於此通了

其中所說諸法是全

一心之諸法一心是全諸法之一心性相圓融一多

自在故諸佛與衆生交徹淨土與穢土融通法法皆彼此互收塵塵悉包含世界相入相卽無尋鎔融具十玄門重重無盡名爲無障尋法界此上頓漸皆就

佛約教而說若就機約悟修說者意又不同如前所

叙諸家有云先因漸修功成而豁然頓悟猶如伐木片片漸所

一時頓倒亦如遠詣都城有云因頓修而漸悟如人

步步漸行一日頓到也漸親漸中此說運心頓修不言功行頓畢有云因漸

修而漸悟如登九層之臺足履漸高所見漸遠等者

皆說證悟也有云先須頓悟方可漸修者此約解悟

也約斷障說如日頓出霜露漸消約成德說如孩故

華嚴說初發心時即成正覺然後三賢十聖次第修

證若未悟而修非真修也良以非真流之行無以稱

起故彼經說若未聞說此法多有云頓悟頓修者此

劫修六度行畢竟不能證真也

說上上智根性樂欲俱勝根勝故悟一聞千悟得大

總持一念不生前後際斷斷障如斬一縷絲萬條頓

頓色也荷澤云見無念體不逐物生又云一念與本性相應便具河沙功德八萬四千波羅蜜門一時齊

用也此人三業唯獨自明了餘人所不見金剛三昧經云空心不動

具六波羅蜜法華亦說父母所生眼耳徹見三千界等也且就事跡而言之如牛

頭融大師之類也此門有二意若因悟而修卽是解

悟若因修而悟卽是證悟然上皆只約今生而論若

遠推宿世則唯漸無頓今頓見者已是多生漸熏而

發現也有云法無頓漸頓漸在機者誠哉此理固不

在言本只論機誰言法體頓漸義意有此多門門門

有意非强穿鑿況楞伽四漸四頓

義與漸修頓悟相類

此猶不

敢繁云比見時輩論者但有頓漸之言都不分析就

教有化儀之頓漸應機之頓漸就人有教授方便之

頓漸根性悟入之頓漸發意修行之頓漸於中唯云

先頓悟後漸修似違反也欲絕疑者豈不見日光頓

出霜露漸消孩子頓生

四肢六根即具

志氣漸立

肌膚人物業藝皆漸

成也猛風頓息波浪漸停明良頓成禮樂漸學

如高貴子孫於

小時亂沒落為奴生來自不知貴時清父母訪得當日全身是貴人而行跡去就不可頓改故須漸學

是知頓漸之義甚為要矣然此文本意雖但叙禪詮

緣達摩一宗是佛法通體諸家所述又各不同今集

爲一藏都成理事具足至於悟解修證門戶亦始終
周圓故所叙之頓漸須備盡其意令血脉連續本末
有緒欲見本末綸緒先須推窮此上三種頓說漸說
教中所詮之法本從何來見在何處又須仰觀諸佛
說此教意本爲何事卽一大藏經始終本末一時洞
然明了也且推窮教法從何來者本從世尊一真心
體流出展轉至於當時人之耳今時人之目其所說
義亦只是凡聖所依一真心體隨緣流出展轉遍一
切處徧一切衆生身心之中但各於自心靜念如理
思惟卽如是如是而顯現也

華嚴云如是如是思惟如是如是顯現也

觀佛說經本意者世尊自云我本意唯爲一大事因緣故出現於世一大事者欲令衆生開佛知見乃至入佛知見道故諸有所作常爲一事唯以佛之知見示悟衆生無有餘乘若二若三三世十方諸佛法亦如是雖以無量無數方便種種因緣譬喻言詞而爲衆生演說諸法是法皆爲一佛乘故故我於菩提樹下初成正覺普見一切衆生皆成正覺乃至普見一切衆生皆般涅槃

華嚴妙嚴品云佛在摩竭提國菩提場中如成正覺其地堅固金剛

所成其菩提樹高廣嚴顯出現品云如來成正覺時普見衆生等一一如文普見一切衆

生貪恚癡諸煩惱中有如來身智常無染污德相備

足

如來藏經文也

無一衆生而不具有如來智慧但以妄

執着而不證得我欲教以聖道令其永離妄想自於

身中得見如來廣大智慧如我無異

華嚴出現品文也唯改當字爲

欲字令順語勢也法華亦云我本立誓願欲令一切衆如我等無異

遂爲此等衆生於

菩提場稱於大方廣法界敷演萬德因華以嚴本性

令成萬德佛果其有往劫與我同種善根曾得我於

劫海中以四攝法而攝受者

亦妙嚴品文也

始見我身

頻呻三昧

盧舍那身

聞我所說

說上華嚴

卽皆信受入如來慧乃至逝多

林我入師子頻呻三昧大衆皆證法界除先修習學

小乘者

佛在法華會說昔在華嚴會中五百聲聞如聾如盲不見佛境界不聞圓融法是也次云

我今亦令得聞此經入於佛慧卽直至
四十年後法華會中皆得授記是也
及溺貪愛之

水等者

亦出現品云如來智慧唯於二處不能爲作
生長利益所謂二乘墮於無爲廣大深坑及

壞善根非器衆生溺大邪見貪愛之水然亦於彼曾
無厭捨釋曰卽華嚴所說學小乘者法華會中還得
授記及不在此會亦展轉令

如是衆生諸根鈍著樂

與授記是此云不厭捨也

癡所盲難可度脫我於三七日思惟如是事我若但
爲讚於佛乘彼卽沒在苦毀謗不信故疾入於惡道
若以小乘法乃至於一人我卽墮慳貪此事爲不可
進退難爲遂尋念過去佛所行方便力方知過去諸
佛皆以小乘引誘然後令入究竟一乘故我今所得
道亦應說三乘我如是思惟時十方佛皆現梵音慰

喻我善哉釋迦文第一之導師得是無上法隨諸一

切佛而用方便力我聞慰喻隨順諸佛意故方往波

羅捺國轉四諦法輪度憍陳如等五人漸漸諸處乃

至千萬如羊車也亦為求緣覺說十二因緣如鹿車也亦為求

大乘者說六波羅蜜如牛車也此上皆當第一密意依性說相教此上三車皆是宅

中指云在門外者以喻權教三乘云云中間又為說甚深般若波羅蜜

淘汰如上聲聞進趣諸小菩薩此當第二密意破相顯性教也漸漸

見其根熟遂於靈鷲山開示如來知見普皆與授阿

耨多羅三藐三菩提記究竟一乘如四衢道中白牛車也權教牛車大乘與實教

白牛車一乘不同者三顯示三乘法身平等入一乘十餘本經論具有明文

道乃至我臨欲滅度在拘尸那城娑羅雙樹間作大

師子吼顯常住法決定說言一切衆生皆有佛性凡

是有心定當作佛究竟涅槃常樂我淨皆令安住祕

密藏中

法華且收二乘至涅槃經方普收六道會權入實須漸次故也卽與華嚴海

會師子頻呻大衆頓證無有別異

法華涅槃是漸教中之終極與華嚴

等頓教深淺無異都爲第一三顯示真心卽性教也

我旣所應度者皆以度訖

未得度者已爲作得度因緣故於雙樹間入大寂滅

定反本還源與十方三世一切諸佛常住法界常寂

常照也評曰上來三紙全是於諸經中錄佛自言也

但以抄錄之故不免於連續綴合之處或加減改換

三字兩字而已唯叙華嚴處一行半是以經題顯佛
意非佛本語也便請將佛此自述本意判前三種教
宗豈得言權實一般豈得言始終二法禪宗例教誰
謂不然竊欲和會良由此也誰聞此說而不除疑若
猶執迷則吾不復也然上所引佛自云我見衆生皆
成正覺又云根鈍癡盲語似相違便欲於其中次第
通釋恐間雜佛語文相交加今於此後方始全依上
代祖師馬鳴菩薩具明衆生一心迷悟本末始終悉
令顯現自然見全佛之衆生擾擾生死全衆生之佛
寂寂涅槃全頓悟之習氣念念攀緣全習氣之頓悟

心心寂照卽於佛語相違之處自見無所違也謂六道凡夫三乘賢聖根本悉是靈明清淨一法界心性覺寶光各各圓滿本不名諸佛亦不名衆生但以此心靈妙自在不守自性故隨迷悟之緣造業受報遂名衆生修道證真遂名諸佛又雖隨緣而不失自性故常非虛妄常無變異不可破壞唯是一心遂名真如故此一心常具真如生滅二門未曾暫闕但隨緣門中凡聖無定謂本來未曾覺悟故說煩惱無始若悟修證卽煩惱斷盡故說有終然實無別始覺亦無不覺畢竟平等故此一心法爾有真妄二義二義復

各二義故常具真如生滅二門各二義者真有不變
隨緣二義妄有體空成事二義謂由真不變故妄體
空爲真如門由真隨緣故妄成事爲生滅門以生滅
卽真如故諸經說無佛無衆生本來涅槃常寂滅相
又以真如卽生滅故經云法身流轉五道名曰衆生
旣知迷悟凡聖在生滅門今於此門具彰凡聖二相
卽真妄和合非一非異名爲阿賴耶識此識在凡本
來常有覺與不覺二義覺是三乘賢聖之本不覺是
六道凡夫之本今且示凡夫本末總有十重

側注一
合之一

一謂一切衆生雖皆有本覺真心

如一富貴
人端正多

今每重
以夢喻

智自在二未遇善友開示法爾本來不覺如宅中人

也論云依本覺三不覺故法爾念起如睡法爾有夢

生三種相四念起故有能見相如夢中五以有見故

根身世界妄現夢中別見有身在他鄉貧六不知此

等從自念起執為定有名為法執正夢時法爾必執

七執法定故便見自他之殊名為我執夢時必認他

身已本八執此四大為我身故法爾貪愛順情諸境欲

以潤我嗔嫌違情諸境恐損惱我愚癡之情種種計

校此是三毒如夢在他鄉所九由此故造善惡等業

夢中或偷奪打十業或貪嗔也以難逃如影響應於形聲故受

罵或行恩布德

六道業繫苦樂相

如夢因偷奪打罵彼捉枷禁決罰或因行恩得報舉薦拜官署職

此上十重生起次第血脉連接行相甚明但約理觀心而推照卽歷然可見次辨悟後修證還有十重翻妄卽真無別法故然迷悟義別順逆次殊前是迷真逐妄從微細順次生起展轉至麤後乃悟妄歸真從麤重逆次斷除展轉至細以能翻之智自淺之深麤障易遣淺智卽能翻故細惑難除深智方能斷故故後十從末逆次翻破前十唯後一前二有少叅差下當顯示十重者

禪源諸詮集都序卷下之一

徽州居士吳繼勳慕教門之廣大愍末法之衰頽施貲刻此

禪源諸詮集卷下之一願蚤悟一乘深證佛

果揚教海之波瀾徧周沙界作人天之眼目廣

度含靈者

平湖釋在昭對南昌萬承明書上元許一科刻
萬曆丁未十一月寂照庵識

禪源諸詮集都序卷下之二

唐圭峯山沙門宗密述

一謂有衆生遇善知識開示上說本覺真心宿世曾

聞今得解悟

若宿生未聞今聞必不信或信而不解雖人人等有佛性今現有不信不悟者

是此類也

四大非我五蘊皆空信自真如及三寶德

信自心本

不虛妄本不變異故曰真如故論云自信已性知心妄動無別境界又云信心有四種一信根本樂念真

如二信佛有無量功德常念親近供養三信法有大利益常念修行四信僧能修正行自利利他常樂親

近悟前一翻前二

二發悲智願誓證菩提

發悲心者欲度衆生

成此第一重也

三隨分修習施戒忍進

及止觀等增長信根

論云修行有五能成此信止觀合爲一行故六度唯成五也

四大菩提心從此顯發

以上三心開發論云信成就發心者有三種一者直心正

念真如法故二者深心樂集諸善行故三發大悲心欲拔一切眾生苦故五以知法性無

慳等心

等者貪欲嗔恚懈怠散亂愚癡

六隨順修行六波羅蜜定慧

力用

初修名止觀成就名定慧

我法雙亡

初發心時已約教理觀執空今即定慧力觀

自覺空也

無自無他

證我空五

常空常幻

證法空六色不異空證法空六色不異空

幻也七於色自在一切融通

迷時不知從自心變故不自在

今因二空智達之故

融通也

八於心自在無所不照

既不見心外別有境界唯心故自在也

九滿足方便一念相應覺心初起心無初相離微細

念心即常住直覺於迷源名究竟覺

從初發心即修無念至此方得

成就成就故即入佛位也

十心既無念則無別始覺之殊本來平

等同一覺故冥於根本真淨心源應用塵沙盡未來際常住法界感而卽通名大覺尊佛無異佛是本佛無別新成故普見一切衆生皆同成等正覺故迷與悟各有十重順逆相翻行相甚顯此之第一對前一二此十合前第一餘八皆從後逆次翻破前八一中悟前第一本覺翻前第二不覺前以不覺乖於本覺真妄相違故開爲兩重今以悟卽冥符冥符相順無別始悟故合之爲一又若據逆順之次此一合翻前十今以頓悟門中理須直認本體翻前本迷故對前一二

上云參差卽是此也

二中由怖生死之苦發三心自度度

他故對前第十六道生死三修五行。翻前第九造業。
四三心開發。翻前第八三毒。悲心翻瞋。智心翻癡。願心翻貪。五證我
空。翻前第七我執。六證法空。翻前第六法執。七色自
在。翻前第五境界。八心自在。翻前第四能見。九離念
翻前第三念起。故十成佛。佛無別體。但是始覺。翻前
第二不覺。合前第一本覺。始本不二。唯是真如顯現。
名爲法身大覺。故與初悟無二體也。順逆之次。叅差
正由此矣。一卽因該果海。十卽果徹因源。涅槃經云。
發心畢竟二不別。華嚴經云。初發心時得阿耨菩提。
正是此意。然雖順逆相對。前後相照。法義昭彰。猶恐

文不頓書意不竝顯首尾相隔不得齊覩今更畫之
爲圖令凡聖本末大藏經宗一時現於心鏡此圖頭
在中心云衆生心三字是也從此三字讀之分向兩
畔朱畫表淨妙之法墨畫表垢染之法一一尋血脉
詳之朱爲此○號記淨法十重之次墨爲此●號記
染法十重之次此號是本論之文此點是義說論文
爾

迷有十重 此是迷真逐妄從微細順次生起展轉至盛之相

- 一本覺
- 二不覺
- 三念起
- 四見起
- 五境現
- 六執法
- 七執我
- 八煩惱
- 九造業
- 十受報

業成難境知影緣愚於形聲故受
六道報畢之謂已受之身非可斷
法故生新計之法如夢而偷等打
罵結現相無法罰或因行惡得報
由三事感發不造善因惡業如夢
中或偷打罵或因行惡不造等也
執四大為我身故貪受種種樂味
違情違義計校如夢在彼鄉所
見違法違事亦貪味也
執法定故見自他之殊計自為我
名為執執如夢時必認他鄉彼言
之身為已本身也
不知境從自念起執為我有名為
法執如正夢時法執必執夢中所
見之物為實有也
以有見故根身世界表現如夢中
別見有身在他鄉受苦及見種種
好惡事境
念起故有能見知如夢中之
想也論云以依對故能見不
動則無見
不勝故法因念起如睡去猶有夢
論云以依不覺故心動散名為業
三細起此其第一也
未還等及問示法爾本來不覺不
覺迷真也論云不如實知真知之
法如室中人睡自不知也
謂一切眾生皆有本覺真心
○如實貴人端正多智在自
室中住也

●不覺

六道凡夫之本

◎阿黎耶識

頓悟

謂有眾生遇善知識指示
上說本覺真心宿世曾聞
今得悟解四大非我五蘊

一信根本學念真如法故二信
佛有無量功德常念供養三信
法有大利益常念修行四信僧

覺

三乘賢聖之本

皆空發起四種信心

能正修行常樂親近精進無忘

悟有十重

此是悟妄歸真從緣重逆次斷除展轉至細之相

○一頓悟本覺	悟前一頓前一為第二重證而實無有始得之異本來平等同一覺故妄於根本自淨心源應用塵沙蓋不來際常住法界感而即通名大覺等
○十成佛	滿足方便一念相應覺心初起心無初相離微細念心即常住覺緣遠源名究竟覺從初發心即修無念至此方得成就
○九離念	心自在地不見外有定慧之境故於一切自在無所不照
○八自在	色自在地已證境是自心所現故於色自在融通定慧力用我法便亡
○七色界	法無性故常空常幻悟色空不異也
○六法空	離我執故無自無他於真如理深解現前所修離相以知性體無怪無染離真離妄常寂常照故隨順修行施戒忍進禪慧六度
○五我空	即前悲智願心今開發也論云信成就發三心一直心正念真如法故二深心樂習諸善行故三悲心欲拔眾生苦故
○四開發	五行一隨分施五戒十惡若出家即習頭陀三惡他惱四精進不怠五止觀住靜止
○三修善	一切境正念唯心觀察世間無可愛樂覺知前念起惡能止後念令其不起也
○二覺憂	發悲智願證大智證漸修善法解行論云發悲心者欲度眾生發智心者欲了達一切發願心者欲修善行以資悲智也
○一發怖心	

○成事

由真隨緣故妄識成事為生滅

●妄

論云以不達一法界故忽然念起名為無明無明所染有其染心雖然根身塵境紛然分別緣慮如上寢卧之人夢見自身貧賤種種異狀種種憂喜又如迷上杭木謂為人身神鬼不同不睡之身不迷之木也

○體空

生滅門

○眾生心

經云一實境界者所謂眾生心乃至心有二種一者真二者妄論云所言法者謂眾生心是心總攝一切世間法依於此心顯示厚訶衍義

○隨緣

真如門

○真

論云是心從本已來自性清淨蕩然空寂
了然知覺如福德智慧相自端嚴富貴之
人於自宅堂中寢臥亦如曠野杌木

○不變

由真不變故妄體本空為真如

此上是標位

標此圖中之位也云眾生心者是在纏佛性本論及經皆目為如來藏

及義門

真妄下各二義

是真如門及梨耶識根本義理

兩畔是所標心中性

真如相耶梨

不覺位中諸法

淨法

體也迷時無漏淨妙德用但隱而不滅故真如本覺在有漏

識中

一切眾生皆有佛性是此義也

悟時有漏染相必無故無明識相妄念業

果等不在真如門也唯淨妙德用獨在真如心中名之為佛也

○真如

○妄識空

○真實心

心真如者卽是一法界大總相法門體所謂心性不生不滅又云所謂心性常無念故名爲不變

一切諸法唯依妄念而有差別若離妄念則無一切境界之相

離言

空

不空

以有自體具足無漏性功德故又云已顯法體空無妄故卽是真心常恒不變淨法滿足

是故一切法從本已來離言說相離名字相離心緣相畢竟平等無有變異不可破壞唯是一心故名真如

從本以來一切染法不相應故謂離一切差別之相以無虛妄心念故妄念分別皆不相應也

佛

體大

相大

用大

法身

應身

報身

真如用者諸佛本在因地
行六波羅蜜攝化眾生大
方便智除滅無明見本法
身自然顯現此是法身用偏
一切諸佛具此法身得益

真如自體相者有大智慧光明遍照
法界真實識知常樂我淨等義故其
足如是過恒沙不思議佛法滿足無
有所少名為如來法身也

依凡夫二乘心所見者名為應身
以不知轉識現故見從外來取色
分齊不能盡知故

依諸菩薩從初發意乃至十地心所
見者名為報身身有無量色色有無
量相相有無量好所住依界亦有無
量種種莊嚴隨所示現即無有邊不
可窮盡皆由無漏行重及本覺熏之
所成就具足無量樂相故名為報也

詳究前述諦觀此圖對勘自他及想賢聖為同為異

為真為妄我在何門佛在何位為當別體為復同源

即自然不執著於凡夫不僭濫於聖位不耽滯於愛

見不推讓於佛心也然初十重是一藏經所治法身

中第一重煩惱之病生起元由次三漸漸加增我法乃

至麤重造業慧滅報受之狀後十重是法身信方服藥

前三重汗出病差菩提心將理方法六波羅蜜漸漸減退

從六重乃至平復佛成之狀如有一人在纏諸根具足恒

功德强壯常住不變多藝恒沙忽然得病無始漸漸加

增其次乃至氣絕第十唯心頭暖無漏智忽遇良

醫

大善知識

知其命在

見凡夫人

強灌神藥

初聞不信

忽

然蘇醒

悟解

初未能言

初悟之人未能說法答他問難皆悉未得

乃至漸語

能說法也

漸能行履

十地十波羅蜜

直至平復

成佛

所解伎藝無所

不爲

神通光明一切種智

以法一一對合何有疑而不除也卽

知一切衆生不能神變作用者但以業識惑病所拘

非已法身不具妙德今愚者難云汝旣頓悟卽佛何

不放光者何殊令病未平復之人便作身上本藝然

世醫處方必先候脉若不對病狀輕重何辨方書是

非若不約痊愈淺深何論將理法則法醫亦爾故今

具述迷悟各十重之本末將前經論統三種之淺深

相對照之如指其掌勸諸學者善自安心行卽任隨
寄一門解卽須通達無尋又不得慮其偏局便漈蕩
無所指歸須洞鑒源流令分菽麥必使同中見異異
處而同鏡像千差莫執好醜鏡明一相莫忌青黃千
器一金雖無阻隔一珠千影元不混和建志運心等
虛空界防非察念在毫釐間見色聞聲自思如影響
不動身舉意自料爲佛法否美饌糲食自想無嫌愛
否炎涼凍暖自看免避就否乃至利衰毀譽稱譏苦
樂一一審自反照實得情意一種否必若自料未得
如此卽色未似影聲未似響也設實頓悟終須漸修

莫如貧窮人終日數他寶自無半錢分六祖大師云
佛說一切法爲度一切心我無一切心何須一切法
今時人但將此語輕於聽學都不自觀實無心否若
無心者八風不能動也設習氣未盡嗔念任運起時
無打罵讐他心貪念任運起時無營求令得心見他
榮盛時無嫉妬求勝心一切時中於自己無憂饑凍
心無恐人輕賤心乃至種種此等亦得名爲無一切
心也此名修道若得對違順等境都無貪嗔愛惡此
名得道各各反照有病卽治無病勿藥問貪嗔等卽
空便名無一切心何必對治答若爾汝今忽遭重病

痛苦痛苦卽空便名無病何必藥治須知貪嗔空而能發業業亦空而能招苦苦亦空只麼難忍故前圖

中云體空成事

如杌木上鬼全空只麼驚人得奔走倒地頭破額裂

若以業卽

空空只麼造業卽須知地獄燒煮痛楚亦空空只麼

楚痛若云亦任楚痛者卽現今設有人以火燒刀所

汝何得不任今觀學道者聞一句違情語猶不能任

豈肯任燒斫乎

如此者十中有九也

問上來所叙三種教三宗

禪十所以十別異輪迴及修證又各十重理無不窮

事無不備研尋玩味足可修心何必更讀藏經及集

諸禪偈數過百卷答衆生惑病各各不同數等塵沙

何唯八萬諸聖方便有無量門一心性相有無量義
上來所述但是提綱雖統之不出所陳而用之千變
萬勢況先哲後俊各有所長古聖今賢各有所利故
集諸家之善記其宗徒有不安者亦不改易但遺闕
意義者注而圓之文字繁重者注而辨之仍於每一
家之首注評大意提綱意在張網不可去綱存綱華嚴
云張大教網鹿人但集而不叙如無綱之網若但叙而不集如無綱之
天魚置涅槃岸綱思而悉之不煩設難然尅已獨善之輩不必徧尋
若欲爲人之師直須備通本末好學之士披閱之時

必須一一詳之是何宗何教之義用之不錯皆成妙藥用之差互皆成反惡然結集次第不易排倫據入道方便卽合先開本心次通理事次讚法勝妙呵世過患次勸誡修習後示以對治方便漸次門戶今欲依此編之乃覺師資昭穆顛倒交不穩便且如六代之後多述一真達摩大師却教四行不可孫爲部首祖爲末篇數日之中思惟此事欲將達摩宗枝之外爲首又以彼諸家所教之禪所述之理非代代可師通方之常道或因以彼修鍊功至證得卽以之示人

求耶慧稠
計輪之類

或因聽讀聖教生解卽以之攝衆

慧聞禪
師之類

或降其跡而適性一時間警策羣迷

志公傳大士王梵志之類

或

高其節而守法一國中軌範僧侶

廬山遠公之類

其所製作

或詠歌至道或嗟歎迷凡或但釋義或唯勵行或籠

羅諸教竟不指南或偏讚一門事不通衆雖皆禪門

影響佛法笙簧若始終依之爲釋迦法卽未可也

天台

言教廣本雖備有始終又不在此集之內

以心傳嗣唯達摩宗心是法源

何法不備所修禪行似局一門所傳心宗實通三學

況覆尋其始

始者迦葉阿難

親稟釋迦代代相承一一面授

三十七世

有云西國已有二十八祖者下祖傳序中卽具分析

至於吾師

緬思何幸

得爲釋迦三十代嫡孫也

故今所集之次者先錄達摩一宗次

官司文案曹判爲先尊官判後也

唯寫文尅的就當者十餘卷也

就當

宗之中以尊卑昭穆展轉綸緒而爲次第其中頓漸

相間理行相參通相解縛自然心無所住

淨名云貪著禪味是

菩薩縛以方便生是菩薩解又

悟修之道既備解行

於是圓通次俯覽諸家以廣聞見然後誦讀聖教以

印始終豈不因此正法久住在余之志雖無所求然

護法之心神理不應屈我繼襲之功先祖不應捨我

法施之恩後學不應辜我如不辜不屈不捨卽願共

諸同緣速會諸佛會也

禪源諸詮集都序卷下之二

徽州居士吳繼勳慕教門之廣大愍末法之衰頽施貲刻此

禪源諸詮集卷下之二 願蚤悟一乘深證佛果揚教海之波瀾徧周沙界作人天之眼目廣度含靈者

平湖釋在照對南昌萬承明書上元許一科刻萬曆丁未十一月寂照庵識